

請托規得三品者間或有之願自今兩府外嘉善以下告身必
令臺諫署出以正百官以勵士風一佛氏之道以離世絕俗為
宗婦女之義以正靜自守為主以故國家嚴立法令凡婦女上
寺者痛行禁斷以明風教近來法令廢弛婦女上寺絡繹於道
宣淫失節職此之由甚非明時之令典也願令攸司婦女上寺
者勿論父母追會一皆禁斷以正風俗 上皆允之惟告身事
不允○丙子命召趙休鄭易等臺諫刑曹員皆令上京○丁
丑日珥且背夜南方有赤氣○戊寅太白晝見○己卯日珥○
行大陽獨醮及金星獨醮禳災也○甲申 上朝 太上殿獻
壽夜還○丙戌命領春秋館事河峯知館事權近考前朝官制
於高麗史○戊子夜寅卯地有赤氣○己丑夜巽方及西北有
赤氣庚寅亦如之○辛卯東方有赤氣○壬辰司譯院副使李
自瑛押逃軍金加勿等男婦并二十八名赴遼東○癸巳夜艮
方有赤氣○乙未 上親祭于仁昭殿遂詣太上殿獻壽
○上王拜 齊陵○丁酉 上朝 太上殿遂詣 上王殿歲除